

TENTERA DARAT MALAYSIA BANTU PALAPES KUKUM

Pasukan Latihan Pegawai Simpanan (PALAPES) Kolej Universiti Kejuruteraan Utara Malaysia kini mendapat bantuan Tentera Darat Malaysia (TDM) bagi memudahkan pergerakan dan latihan anggotanya. TDM akan menyediakan trak tiga tan untuk mengangkut anggota PALAPES universiti itu bergerak dari satu tempat ke tempat lain sewaktu menjalani latihan.

Rektor KUKUM Prof. Dato' Dr Kamarudin Hussin berkata, anggota PALAPES KUKUM bakal memainkan peranan penting jika negara berdepan dengan keadaan tidak diinginkan dan di luar jangkaan.

“PALAPES KUKUM berada di utara semenanjung dan bersempadanan dengan negara jiran. Merekalah yang akan menjadi pasukan paling depan dan sewajarnya dilengkapi serta disediakan dengan pelbagai kemudahan” katanya di Majlis Makan Malam Sempena Ulangtahun Pertama Penubuhan Pasukan Latihan Pegawai Simpanan (PALAPES), Persatuan Bulan Sabit Merah Malaysia (PBSMM) dan Pasukan Bertindak KUKUM (PBK) pada 8 Februari 2006 yang bertempat di Kelab Golf Putra, Sg. Batu Pahat, Kangar, Perlis.

Datuk Dr Kamarudin juga berharap lebih ramai penuntut dan kakitangannya menyertai badan sukarela itu. Ia membolehkan matlamat untuk mencurahkan bakti dan khidmat kepada golongan yang memerlukan dapat dicapai.

Majlis yang akan berlangsung pada jam 8.15 malam dihadiri oleh DYMM Pemangku Raja Perlis dan DYMM Raja Puan Muda Perlis, yang telah sudi bercemar Duli berangkat ke majlis

makan malam itu nanti. Baginda turut menyempurnakan upacara memotong pulut kuning sebagai tanda simbolik setahun penubuhan ketiga-tiga badan tersebut.

Turut hadir ke majlis itu Panglima Latihan Tentera Darat, Pengerusi Kebangsaan PBSMM, anggota-anggota PALAPES, PBSMM, PBK dan Ketua-ketua Jabatan KUKUM.

Di majlis tersebut juga diadakan majlis penyampaian hadiah akademik terbaik dan pegawai terbaik kepada PALAPES serta penyampaian anugerah khas kepada PBSMM dan PBK yang cemerlang bagi tahun 2005. Majlis makan malam tersebut turut diserikan dengan persembahan oleh Unit Kebudayaan KUKUM.

